

PFA'-OR-OR AY TU-TU'-AG.

1 Anu cha Pfa'-or-or ay Tu-tu'-ag.

2 Gwa han ohan arkhaw ja inalin Pfa'-or-or ay Tu-tu'-ag hi, <<Chad a mah, hiton khayyum u, an hi Tu-tu'-ag? Ta i ta mangajiw ta gway itongo ta-o.>>

3 Inalin Tu-tu'-ag hi, <<Ti aa.>>

4 Amat hichi ja nuntunud cha Pfa'-or-or ay Tu-tu'-ag.

5 Empacheh cha an umuy hichi pfuludna ta i cha mangajiw.

6 Ja agkhuy cha ne-atam ay chi omajan cha ja tinnig cha han pfalat ay chuy oha an pfuludna.

7 Ja inali cha hi, <<Alaon tah chi pfalat ta i ta itanum.>>

8 Ja mumpolloh cha Pfa'-or-or ay Tu-tu'-ag nu ngay mahhun hi mangala ay nuy otchutna ti un ken oh-ohha hotti mahapor an pfonggwahon cha.

9 Ja inalin Tu-tu'-ag hi, <<Ha'-in hichi otchutna ta gway tupfu na.>>

10 Ja inalin Pfa'-or-or, <<Ti aa atag ja ha'-in ay chuy puuna.>>

11 Ja amat hichi ja enoggar cha chin pfalat ja pfinonggwah cha ja un gwachinonon ken hon impi-ug na chin itanum na.

12 Ja in-uy cha ay chuy oha an pfuludna ta intanum cha ja nakak cha.

13 Immuy chi toloh arkhaw ja inalin Pfa'-or-or ay Tu-tu'-ag hi, <<I ta adchiyya ta i ta tikhan chin intanum ta an pfalat.>>

14 Empacheh cha an umuy ja ne-atam cha.

15 Unchaagkhu i tinnig ja immugho' chin intanum Pfa'-or-or an gway lamot na.

16 Ja chin pfalat ayya Tu-tu'-ag ja narngoy ti ma-id lamot na.

17 Ja amat hichi ja nakak cha.

18 Ja immuy chi ohah pfulan ja i cha khuh tinnikhaw nu pfimmunga chin intanum Pfa'-or-or.

19 Ja pfimmungaot chin pfalat Pfa'-or-or ja nalum cha.

20 Ja inalin Pfa'-or-or hi, <<Ha, ha, ha! Nalum chin pfalat u.>>

21 Ja komi'-ilah Tu-tu'-ag ti ma-id ken pfalat na ti natoy.

22 Ja inalin khu Pfa'-or-or hi, <<Inay kayku, an ma-id anila' an omajat! Ma-id olog u an i mangala ay chuy pfunga na.>>

23 Ja inalin Tu-tu'-ag hi, <<Ha-in mah chi omajat ti anila' ta un u khun ituud hay anum.>>

24 Ja inalin Pfa'-or-or hi, <<Aa umuy a mah ta im alan.>>

25 Emmajat hi Tu-tu'-ag ja allona hi, <<Ha, ha, ha! Ha-in chi omman hi pfalat!>>

26 Ja amat hichi ja ente-a na gwot an omman ja titigkhan Pfa'-or-or ja inkhimoh na an umun.

27 Ja allona hi, <<Ti ituud mu mah hay pe'-an u.>>

28 Ja inalin Tu-tu'-ag hi, <<Angnga' ni'. Ma-id makay ituud u ti anu' an amin.>>

29 Ja inalin khu Pfa'-or-or hi, <<Muti hinuy mah ni' karkaloppeh na ja ituud mu.>>

30 Ja inalin Tu-tu'-ag chi, <<Angnga'. Ti unchah hitay karkaloppeh na ja un u achi pe'-an?>>

31 Ja inalin khu Pfa'-or-or hi, <<Ti hinuy mah ni' nguhub na ja ituud mu ta pe'-an u.>>

32 Ja inalin khu Tu-tu'-ag hi, <<Angnga'. Unchah hitay nguhub na ja un u achi pe'-an?>>

33 Pfimmungot hi Pfa'-or-or ja allona hi, <<Nga khuy ato' ay hija? Anaad una' achi pe'chatan hi pe'-an u?>>

34 Ja immuy ja i nun-akhid hi lunu ja in-uy na inhukha ay chuy puun chuy pfalat ja immuy nunhinop ay chuy ongot.

35 Napoh chin pfolat ja khimmahad hi Tu'tu'-ag.
36 Unagkhu khimmahad ja nappfo' chin hu-i na.
37 Nappfo' chin hu-i na ja khun munjamunjakjakengkeng.
38 Ja immuy ja i inumpfun ay chi ongot ta aanuna chin netpfo' ay chin hu-i na.
39 Unagkhu inumpfun ay chuy ongot ja lenompfot chin igwit na ay chi nanabpfot ja enalat khu Pfa'-or-or.
40 Ja amat hichi ja unagkhu ento'gwab Tu'tu'-ag chin ongot ja gawwacha hi Pfa'-or-or an nunhihinop.
41 Ja allon Tu'tu'-ag hi, <<Anagkha ta uja' hukhaon ay he-a? Titigkham ta nu aanu' hitay netpfo' ot patajo' he-a!>>
42 Ja amat hichi an gwan khun aanun Tu'tu'-ag chin netpfo' ja lemmajaw hi Pfa'-or-or.
43 Immuy ay chi oha an pfuludna ja nablay hotti inta'chug na ay chuy puun chi agwajan.
44 Unagkhu na'na'-amtang ja gwacha hi Tu'tu'-ag ja allona hi, <<He-a hi Pfa'-or-or an i nanukha ay tay hu-i' ja im khu enalat hitay igwit u?>>
45 Ja enhaot Pfa'-or-or an allona hi, <<Pfu-un makay atag ti un akkay hay uchumna hi Pfa'-or-or chi nangalat ay nuy igwit mu.>>
46 Ja inalin Tu'tu'-ag hi, <<Anagkha ta mihihittay a mah?>>
47 Ja inalin Pfa'-or-or hi, <<Mihihittaja' ta immijah ayya ja najob hitay agwajan ja empachaor uh tay pfokhang u ta ma-ikhud hini chi-a na .>>
48 Ja inalin Tu'tu'-ag hi, <<Ha-in adchiyya ta pe'pacha'.>>
49 Ja inalin Pfa'-or-or hi, <<Ti aa kayku.>>
50 Ja hehehennod cha ta immijah.
51 Ja gwa an najob chin agwajan ja in-uy Tu'tu'-ag chin pfokhang na an i epachaor ay chi agwajan.
52 Ja na-ipit chin pfokhang Tu'tu'-ag.
53 Ja empacheh khuh Pfa'-or-or an lomajaw.
54 Ja amat hichi ken, ja allon Tu'tu'-ag hi, <<Chaamah khu ni' hi Pfa'-or-or an una' i lahlalahan ti tan i na-ipit hitay pfokhang u?>>
55 Inunud na hi Pfa'-or-or ja immuy ay chi oha an pfuludna ja chinakngana.
56 Ja inali na hi, <<He-a man hini nangali un u i epachaor hitay pfokhang u ay nuy agwajan ti tan i na-ipit.>>
57 Ja enhaot khu Pfa'-or-or an allona hi, <<Pfu-un makay atag ha-in ti un akkay hay uchumna hi Pfa'-or-or ti tan un u pfabpfantajan hitay hili an intanum u ti nan un cho-or hini maloh hon enala cha.>>
58 Ja allon Tu'tu'-ag hi, <<Ngay pe-apjaan tay hili?>>
59 Allon Pfa'-or-or hi, <<Hijah tay mah hinuy khun cha e-akhah hi monnengneng an mata.>>
60 Ja allon Tu'tu'-ag hi, <<Ijam akkay mah ta e'-apja' ay tay mata' ti tan un umani-ini'.>>
61 Ja allon Pfa'-or-or hi, <<Ti aa kayku.>>
62 Ja amat hichi ja enalan Tu'tu'-ag chin oha an nalum an hili ja inipchit na chin mata na.
63 Ja napa-itan ja ma-id atona an tumikhaw.
64 Ja empacheh gwot khu Pfa'-or-or an lomajaw.
65 Punnamugwana i pangolahan Tu'tu'-ag chin mata na ta ma-aan chin pa-it na.
66 Ja nangunud khuh ta i na hingiton hi Pfa'-or-or.

67 Khun umu-umuy hichi pfuludna ja chinakngana khu hi Pfa'-or-or an gwa an inu-umpfun chin puun chin ajiw an nenegpong ay chi gwanggwang.

68 Ja allona hi, <<Unchah he-a hi Pfa'-or-or an nangali an hiliya' hitay mata' ti tan napa-itana'?'>>

69 Ja allon Pfa'-or-or hi, <<Pfu-un ti tan una' atag imma-ali ay tay ta hohodcho' ta pfimmutay ayya hini pfulan ja uja' enala ay chuy pohong.>>

70 Ja inalin Tu'tu'-ag hi, <<Ha-in chi i mangala!>>

71 Ja allon Pfa'-or-or hi, <<Achi ti un oh-ohha hinuy pfulan ja achi' podhon an gway uchumna hi mangala. Hijaot un u i-ibpfun ta ha-in chi mahhun an mangala.>>

72 Ja allon Tu'tu'-ag hi, <<Ngay i pangalaan ay ni pfulan?>>

73 Ja allon Pfa'-or-or hi, <<Nu madhom ja pfumutay hini pfulan ay chi gwanggwang hotti ay chi pohong chi i pangalan.>>

74 Ja allon Tu'tu'-ag hi, <<Ha-in adchiyya chi i mangala ti ma-id olog mu an i mangala.>>

75 Ja allon Pfa'-or-or hi, <<Ot hohodchon ta ta pfumutay ayya hini pfulan ja lemmatto' a ay chi pohong ta im alan hinuy pfulan.>>

76 Unagkhu nadhom ja pfimmulan hichi ad uchu ja na-agwaan chin pfulan ay chi pohong.

77 Ja allon Pfa'-or-or hi, <<Chuyya hini pfulan hichi ad chalom. Lomatto' a mah, Tu'tu'-ag, ta im alan muti he'-a ta ken an chugwa.>>

78 Ja allon Tu'tu'-ag hi, <<Aa.>>

79 Ja enlatto' na ken ay chuy pohong an ad chalom.

80 Ja narteng hi Tu'tu'-ag ja ma-id ken i na enala hi pfulan ti un tugwali agwa chin tinnig cha.

81 Ja madmachennor hi Pfa'-or-or ti natoy hi Tu'tu'-ag an khun mangumangunud an mamatoy ay hija.

82 Ja angkhay.